

Sentiasa kemas kini data ramalan cuaca dan banjir – Sultan Pahang

Oleh NORFARHIZA MOHD ATAR | 1 Disember 2024, 7:17 pm



AL SULTAN Abdullah bersama Tunku Azizah serta Tengku Hassan berangkat bercemar duli menyampaikan bantuan kepada mangsa banjir di Pusat Pemindahan Sementara (PPS) Dewan Kampung Lechar di Raub hari ini.

RAUB – Sultan Pahang, Al-Sultan Abdullah Ri'ayatuddin Al-Mustafa Billah Shah bertitah Jabatan Meteorologi Malaysia (METMalaysia) dan pihak berkuasa terlibat supaya sentiasa mengemas kini data berkaitan ramalan cuaca dan kejadian banjir yang berlaku dengan lebih kerap.

Baginda bertitah, ini bagi memastikan penduduk di kawasan yang sering terlibat dengan banjir peka dengan situasi semasa.

“Saya ingin mengingatkan berdasarkan pada laporan kaji cuaca kita dijangka menghadapi cuaca tidak menentu pertengahan dan hujung bulan ini (Disember).

” Ini bermakna air pasang laut akan meningkat dan kalau hujan diramal lebih lebat bermakna limpahan air dari sungai akan berlaku dan kampung di tepi sungai akan terkena banjir.

“Kita minta data yang tepat dan pihak Meteorologi atau pihak berkuasa perlu mengumumkan secara official (rasmi) kerap sikit. Harap juga semua rakyat dengar laporan yang sah,” titah baginda ketika berangkat bercemar duli menyampaikan bantuan kepada mangsa banjir di Pusat Pemindahan Sementara (PPS) Dewan Kampung Lechar dekat sini, hari ini.

Turut berangkat Tengku Ampuan Pahang, Tunku Azizah Aminah Maimunah Iskandariah dan Tengku Mahkota Pahang, Tengku Hassan Ibrahim Alam Shah Ibni Al-Sultan Abdullah.

Ujar baginda, penduduk yang tinggal di kawasan rendah juga harus bersiap sedia menghadapi cuaca yang tidak menentu ini.- KOSMO! ONLINE